

陶雲汀先生奏疏

奏摺卷十四目錄

撫蘇稿

安化陶澍

請飭催沙船以速海運摺子

附片一件

入官房屋捐設義倉摺子

附奏海船陸續回棹趕辦二運摺片

江蘇二次清查案內未豁各款銀兩分別追免

摺子 附片一件

請增

文廟從祀儒臣摺子

覆勘蘇州府城修理完竣摺子

御賜藥錠謝

恩摺子

日本夷船漂收鎮洋縣境撫卹指引回國摺子

海運沙船陸續回棹親往督辦摺子 附片一件

海運全竣船行順利摺子 總督會稿

海運全竣請將在事尤爲出力各員量加鼓勵

摺子 附清單又附片一件  
總督會稿

海運默邀

神佑請加封號扁額摺子

請飭催沙船以速海運摺子 附片一件

奏爲請

旨飭催沙船以速海運事竊照海運米石前經臣於  
會報初運摺內聲明接續辦理現計存留各屬  
及寄存上海棧房之米尙有三十餘萬石專待  
前船回棹方能全行起運現據押運川沙營叅  
將關天培稟稱抵津沙船已有五百餘隻隨後  
各船亦跟接前進又據在津交米委員稟稱有  
程聚泰等十四船於交卸後情願不赴關東運  
豆卽放空回南候裝二運等語該船商等仰沐

皇仁感奮趨公逾常踴躍現在天津收米極爲迅速

其餘各船卽令交兌後趕赴奉天裝豆計算程

途亦不過四月底可回上海受載五月內卽可

將未運米石掃數運北臣前在上海時歷詢者

柁僉稱海船行走全仗風色按照時令各有一

定大約自南赴北總以四五月夏至前後南風

司令最爲相宜六月上旬尙堪行駛及至六月

中旬以後風暴靡常卽難行走一交七月西風

更多商船失事多在此時以故大半停泊候至

冬初乃開俗語謂之屯秋是五月正宜放洋未

可遲誤爲海運第一關鍵惟商船衆多其中爭先趨事者固不乏人而取巧自便者恐亦不免當此各船俱運官糧或冀乘間多攬客貨可以擡高腳價壟斷居奇因而到處逗遛且四月回南多係頂風折戣人力較勞稍存省力之心或竟安坐候風遲遲解纜兼沙船向係裝豆從未裝米少所試驗或慮夏月米有發變意存趨避亦未可定萬一借此支延卽恐錯過風汛別滋貽誤竊思蘇省漕糧歷係軍船裝運經時抵通照米交兌不因夏熱歇運沙船行走較速抵津

不過旬日自可無虞霉變縱使海氣蒸黯亦不過浮面分寸間無礙食用比之錯過風汛乘危冒險得失懸殊况現屆梅雨沙船回次受兌已在米質發熱之後一經斛量吹晾更加堅實無庸以悶艙爲慮且南北辦運一切員役人夫亦須及早竣事方可裁撤以節經費臣與督臣札商所見相同並據藩司賀長齡查明情形詳議前來相應請

旨勅下直隸總督奉天府尹轉飭所在地方官催飭沙船交卸漕米迅卽臣其回南趕裝二運俾得

順趁風汛妥速蒞事實於漕務有裨謹會同督  
臣琦善漕臣陳中孚合詞具

奏伏乞

皇上聖鑒謹

奏

道光六年四月初四日具

奏五月初四日奉到

硃批另有旨欽此同日奉准軍機大臣字寄

貴撫奏前事一件奉

硃批另有旨欽此已奉寄信



諭旨交

欽差穆

直督那

將軍晉

等迅速飭催矣爲

此知會

四月十九日

再海運漕糧截至三月十五日爲止已裝米一百二十三萬餘石並各船放洋出口情形先經附片具

奏在案茲截至三月二十九日續又兌過米二萬九千一百餘石連前共兌米一百二十六萬四千餘石併據崇明縣王青蓮副將裘安邦稟稱由十激出洋米船已有一千一百三十餘隻臣查近日南風順利各船隻自可揚帆北上陸續抵津又據押運委員川沙營叅將闕天培自天津海口來稟據稱三月初十日船至廟島口門

見東南山礁下沉失米船一隻詢係贛字趙聯  
盛沙船裝運荆溪縣米五百石又加裝上海縣  
米一百五十石於三月初三日寄旋廟島口門  
當夜暴風驟起將大桅刮倒激斷錨纜撞至山  
根礁石上登時撞沉幸未傷人當同該汛備弁  
前往查驗屬實其撈獲水米均已潮濕應由蓬  
萊縣通詳辦理已諄囑營縣弁役將被難舵水  
妥爲安頓十一日未刻風轉東南卽督押各船  
開行十四日午後收進天津海口沿路查詢現  
已行至廟島跟接前進者共計船八百餘隻除

已進口船五百一十餘隻外尚有未到口船二百八十餘隻現亦接續前來等情臣查三月初三四五等日連遇暴風江南出口各船尙俱平穩所有趙聯盛一船在東省廟島口門遭風撞沉業經該叅將查驗屬實並無捏飾應請查照章程核辦合併附片以

聞謹

奏

道光六年四月初四日具

奏五月初四日奉到

殊批知道了欽此

入官房屋捐設義倉摺子

奏爲昭文縣入官房屋捐設義倉續估價值不敷  
懇

恩豁免仰祈

聖鑒事竊照道光元年二月欽奉

上諭社義二倉積貯爲民生之大命此時廢弛日久  
自應及時興修以裕民食著通諭各省察看所屬  
州縣地方社義二倉現在存者若干廢者若干以  
次董率修復各趁豐稔之年勸諭紳民殷戶量力  
捐輸妥慎存貯以期緩急有備等因欽此當經前

撫臣轉行欽遵辦理在案臣於上年六月到任後又經通飭各屬實力查辦茲據昭文縣知縣李廷錫稟稱遵卽設法勸諭已據監生吳琳等捐輸穀價錢二百數十千惟創辦之始必須先建倉廩作爲根柢庶陸續勸助易於爲力查有閩戶王長發販米違禁審明治罪案內入官棧房一所計有廩座四十餘間先經前縣朱樹基估值錢三千七百四十五千文於嘉慶十八年咨准部覆照估變解嗣因年久無人承買漸形坍塌又經前縣劉元齡覆估值錢一千二十五

千文至今又越數年更加坍塌請照覆估價值  
捐廉承買設立義倉等情當以續估價值不及  
原估三分之一是否有意短少應作何籌補之  
處批司會議詳辦去後茲據藩臬兩司轉據蘇  
州府核議以此案房屋坐落鄉間全係厥座不  
能居住原估價錢本屬浮多故自嘉慶十八年  
召變以來閱今十有餘年無人承買因此更形  
坍塌就目下情形估計仍照一千二千五百之  
數已屬有贏無絀再爲延緩恐倒塌益甚更難  
售變如將不敷價值著令原估之員賠解查前



任朱樹基已經病故劉元齡已勒休回籍徒事  
咨追於公無濟至現任李廷錫既已捐資承買  
此後從新修葺需費尙多似未便再令捐補所  
有續估價值不敷之數懇求豁免等情詳請具  
奏前來臣查昭文縣李廷錫捐廉置買義倉爲合  
邑之倡事屬急公以貯米棧房仍作倉廩亦適  
合所用惟續估價值核與原估之數多有不敷  
無從籌補竊以此案房屋本係民產入官現在  
該縣購作義倉仍爲官物卽價值稍有未敷似  
應量爲減讓且因多年空廢以致估價不如原

數尙非意存減賤所有不敷價值據該司府所稱追賠無益捐補爲難係屬實在情形惟有仰懇

聖恩俯准照續估價錢一千二十五千文之數聽該縣繳價承買其不敷價錢二千七百餘千文准予豁免庶入官房屋不致廢棄義倉善政卽可舉行實爲兩便理合據情具

奏伏乞

皇上聖鑒訓示謹

奏

道光六年四月初四日具

奏五月初四日奉到

硃批另有旨欽此同日奉到道光六年四月十九日  
內閣奉

上諭陶澍奏入官房屋捐設義倉續估價值不敷請  
豁免一摺江蘇昭文縣圍戶入官棧房一所多年  
曠廢現經該縣購作義倉仍爲官物著准其照續  
估價錢一千二十五千文之數繳價承買其不敷  
原估價錢二千七百餘千文准予豁免無庸追賠  
捐補該部知道欽此

附奏海運船隻陸續回棹趕辦二運摺片

再海運漕糧前次陸續裝米一百二十六萬四千餘石暨各船放洋情形業經具

奏在案茲截至四月十五日續又兌過米二萬八千餘石連前共兌米一百二十九萬二千二百餘石尙有未兌米三十四萬九百餘石專待初次出運沙船回棹方能全行起運前經

奏明請

旨勅下直隸總督奉天府尹催飭沙船交卸漕米迅卽載貨南歸趕裝二運並札飭沿海各員弁實

力催僱勿任趨避支延恐致錯過夏間風汛有  
誤二運茲據委員署松江府知府李景嶧上海  
縣知縣許乃大候補知縣陳用珩等先後稟報  
自四月初六日起至十九日止首運沙船自天  
津回棹已有三十一隻現在首先回棹之周隆  
順等船已裝運二次漕米於四月十六日出口  
並據天津委員李湘茝鄒錫淳等稟報截至四  
月初六日止共已收進天津船一千九十隻又  
據押運川沙營叅將闕天培稟報截至三月三  
十日止共卸竣船五百五十五隻現已由天津

連檣出口計可接續南下該船商等爭先攬運  
事機極爲順利瞬息夏仲南風正多海船最宜  
北行所有未兌漕糧三十四萬餘石現已札飭  
司道飭催各屬分起剝赴上海派運一俟北來  
船隻報有分數臣陶澍仍卽親赴上海彈壓督  
同各員妥貼辦理以期穩速所有海船陸續回  
棹趕辦二運漕米情形合併附

奏仰慰

聖厯伏乞

皇上聖鑒謹

奏

道光六年四月二十八日具

奏五月二十七日奉到

硃批知道了欽此

江蘇二次清查案内未豁各款銀兩分別追免

摺子 附片一件

奏爲籌覆江蘇省未豁二次清查案内各款銀兩  
請分別追豁以普

皇仁而歸覈實事竊照江蘇省二次清查各款銀兩

經前撫臣韓文綺會同前督臣孫玉庭

奏請豁免接准部咨奉

旨戶部議覆江蘇省二次清查案内各屬嘉慶十四  
年以前墊完民欠銀米等項與前經議免十五年  
至二十二年官墊民欠奏准攤賠之款不同又蘇



州等屬節省彌補無著補剩未完銀兩係奏明酌  
提羨餘銀兩彌補之項通共銀四十七萬四百五  
十兩零米三千六百八十九石零俱著不准豁免  
至無官可補並前署陽湖縣已故知縣畢開煜等  
三員未完官欠銀八萬八千九百二十一兩零查  
明赤貧無追著照常例辦理等因欽此當經轉行  
兩藩司欽遵辦理去後茲據江寧布政使張志  
緒蘇州布政使賀長齡查議會詳請

奏前來臣查江蘇省二次清查案內未奉准豁銀  
四十七萬四百五十兩零米三千六百八十九

石零此內銀二十三萬九百二十七兩零米三  
千六百八十九石零係墊完民欠之款又銀二  
十三萬九千五百二十四兩零係無著補剩之  
款查墊完民欠項下江寧藩司所屬銀五萬二  
千二百六十四兩一錢零除宿遷縣馮馨墊完  
銀一百六兩四錢零已據賠繳外尙應代賠銀  
五萬二千一百五十七兩六錢零又前任寶應  
縣已故知縣方恩承等四員應賠銀二千六百  
四十二兩五錢零又米三千六百八十九石零  
折銀八千八百五十四兩八錢零共銀六萬三

千六百五十五兩零蘇州藩司所屬墊完民欠銀一十七萬六千二十兩零續於道光五年四月經前任蘇藩司誠端查出咨追外省之呼延名揚盧煥王棚鰲蔣勵宣等四員銀一萬二千五百四十四兩零先經戶部彙案准免係屬重複應行剔除外尚應代賠銀一十六萬三千四百七十五兩零統計江寧蘇州兩屬應代賠墊完民欠銀二十二萬七千一百三十兩零此項賠款當時委係實欠在民官爲暫墊仍可催追歸款是以二次清查案內原定勒限催追旋因

民欠奉豁無可徵補復又另議攤賠嗣緣核與部議豁免條款相符彙案請豁今既未邀覆准惟有仍於原墊之員名下著賠查現在江蘇服官者有萬承紀陳道坦等四十員計應賠銀一萬五千九百八十兩零陞調他省者趙庭椿何因鎰等九員計應賠銀六千八百七十六兩零告病降革勒休遣戍回籍者張鴻程志忠等五十七員計應賠銀五萬四千七百三十六兩零本員已故及續報家產盡絕者張先甲蘇昌阿等一百一十員計應賠銀一十四萬九千五百

三十六兩零查現在江蘇服官各員名下皆有應補之款加以此項賠款同時追補爲數較多應請稍寬時日自此次奉

旨之日起數在一千兩以內者限一年完繳一千兩以上至二千兩者限二年二千兩以上者統限三年限滿不完先行摘去頂戴仍勒限於半年內清完准其開復如再逾違卽請革職離任押追候補人員限滿不完扣委扣補亦勒限於半年內清完照常委署補缺如再無完卽革職押追其陞調他省各員應賠銀兩請俟各省准咨

之日起照此期限追繳分別現任候補畫一辦理至告病病故降革勒休遣戍回籍等員名下應賠銀兩亦於該省准咨之日起限照追將來如查有實在赤貧無追之款再與先經具報家產盡絕之案均照常例辦理至蘇州藩司所屬二次清查案內無著補剩一款共銀二十三萬九千五百二十四兩零續於道光五年四月據前任蘇藩司誠端查出咨追外省之舒懷靳金鼎盧雲路三員銀八萬四千一百一十六兩零先經戶部彙案准免查係重複應行剔除外實

未准免銀一十五萬五千四百八兩零上屆清查案內因皆係年分久遠人戶產絕無可催追是以議歸無著籌補嗣以此項銀兩係由現任州縣爲嘉慶十四年以前各員彌補之款與部議事未經手人非同案准豁條款相符造冊請免在案今部議以原係彌補之款不准豁免是因其籌補於先卽不准援例請豁而先後時事不同情形迥別江蘇各州縣倉庫錢糧自道光元年欽奉

諭旨清查以後凡入三次清查虧墊各款皆截清年

限分別追補道光元年以後倉庫錢糧卽以交代爲盤查現任各員旣不准其稍有挪移而現在旣有三次清查案內應提限補銀兩及官欠追賠民役各欠逾限應賠之款爲數已屬不少且清查歲報案內每年俱有由咨追提歸無著應行接續彌補又本案內未豁墊完民欠現在議請著賠若再責令兼補舊虧無著之款實屬力有未逮現查江蘇服官之州縣已皆非從前補未足數之原官不免藉口諉卸倘掾之過急又恐不肖州縣挹彼注茲舊欠之補未見其實



效而新虧之弊已接踵而生甚或藉端巧取恣  
意重科其流弊更不可勝言再四思維不得不  
將難以追補情形據實直陳於

聖主之前合無仰懇

皇上天恩俯念此案補剩無著銀一十五萬五千四  
百八兩零本係

恩詔條例內應豁之款前此部文咨查到省業已在  
道光二年十二月截止請豁之後並非登覆遲  
延現在無可籌補

恩准仍予豁免以普

鴻施至案內畢開煜鄧文鏡李紹洛等三員未完官  
欠銀八萬八千九百二十一兩零奉飭查照常  
例辦理現就該員等歷過任所飭查有無貲財  
隱寄照例取結另行分咨各原籍查明如果實  
係家產盡絕由各該省徑行

奏咨請免所有未豁二次清查各款逐一籌議懇  
請分別追免緣由謹會同兩江總督臣琦善合  
詞恭摺具

奏伏乞

皇上聖鑒訓示謹

奏

再二次清查虧墊併官墊民欠案內已奉准免  
註銷原缺常平倉穀不下十餘萬石應照因遞  
缺穀之例動用正項採買惟每石例價止銀六  
錢不敷甚多若責令現任同時採買爲數甚鉅  
賠貼較難並請寬以時日派令分年買補如蒙  
俞允再行飭司查明各州縣應行買補數斟酌地  
方情形分定年限另行辦理合併附片具

奏伏乞

聖鑒訓示謹

奏

道光六年四月二十八日具

奏五月二十七日奉到

硃批另有旨欽此又夾片一件亦奉

硃批另有旨欽此同日奉到道光六年五月十三日

內閣奉

上諭陶澍奏二次清查案內未豁各款銀兩請分別  
追免一摺江寧蘇州兩屬應代賠墊完民欠銀二  
十二萬七千一百三十兩零仍應於原墊各員名  
下著追惟該員等均有應補之款若將此項同時

追補爲數較多著照所請自此次奉旨之日起數  
在一千兩以內者限一年完繳一千兩以上至二  
千兩者予限二年二千兩以上者統限三年如限  
滿不完先行摘去頂帶仍勒限半年內清完准其  
開復倘有遲逾卽著革職離任押追候補人員限  
滿不完扣委扣補亦勒限半年內清完准其委署  
補缺逾限無完卽革職押追陞調他省各員應賠  
銀兩以咨到各省之日起照限著追分別現任候  
補一體辦理其告病病故降革勒休遣戍回籍等  
員應賠銀兩亦著自該省准咨之日起限著追仍

查明照常例覈辦至蘇州藩司所屬清查案內補剩無著銀兩係該州縣爲前任各員彌補之款若仍行追賠有名無實且恐不肖州縣輾轉挪移舊欠未補新虧又增徒滋流弊所有此案補剩無著銀一十五萬五千四百八兩零著加恩准其豁免餘俱照所議辦理又另片奏各案准銷原缺常平倉穀例動正項採買爲數甚多自應寬以時日著飭藩司查明各州縣地方情形將應行買補穀數分定年限奏明辦理該部知道欽此

請增

文廟從祀儒臣摺子

奏爲請增

文廟從祀儒臣以崇正學仰祈

聖鑒事竊惟致治必資懋學繼往卽以開來

孔聖之道師表萬世而歷代端粹之儒亦得從祀

廟庭俾廣心傳典至重也茲據蘇州藩司賀長齡會

同臬司覺羅慶善詳據常州府無錫金匱兩縣

紳士秦大治華端翼陶沅廉志勲等呈稱明故

都察院左都御史謚忠憲高攀龍承晦庵之主

敬師伊川之存心以險阻艱難爲體認身心之地其境愈難其學彌粹凡德業進修之地友朋麗澤之功見於所著三時困學諸記語錄會講等書操履涵養粹然一出於正死生榮辱確乎不動於中實爲理學之宗宜列先儒之祀伏乞詳題從祀

文廟等情由該府縣學取造事實冊結詳司核轉請  
奏前來伏查

欽定明史儒林傳序言正嘉以後篤信程朱不遷異說  
高攀龍其卓卓者又



御批歷代通鑑輯覽注載攀龍學本濂洛操履篤實涵  
養邃密粹然爲一代大儒又

欽定四庫全書總目載高子遺書十二卷其學以格物  
爲先講學語類多切近篤實闡發周密立朝大  
節不愧古人等語又查劉宗周文集稱古有朱  
子今有忠憲黃宗羲謂海內以高劉並推大儒  
可無遺議陸隴其亦謂古今有成德之師有興  
起之師成德之師砥礪磨礪造人材於粹精之  
地程朱是也興起之師廉頑立懦拔人心於陷  
溺之中高劉是也是皆以攀龍與宗周並稱比

諸程朱考其生平持身則主敬存誠立朝則直言正色卒能取義成仁不負所志其立說著書授徒講學皆宗經衛道足以模楷儒林恭逢我國家昌明正學崇勵真儒明臣如劉宗周已荷特旨從祀呂坤黃道周亦皆次第表彰仰邀

俞列兩廡高攀龍忠節旣樹人倫之鵠道德尤爲後

學之宗似宜增入從祀以勵真修而端儒術除將送到事實冊結咨送部科外

督臣琦善江蘇學政臣辛從芬

同兩江總督臣

奏伏乞

恭摺具

皇上聖鑒

敕部議覆施行謹

奏

道光六年四月二十八日具

奏五月二十七日奉到

硃批禮部議奏欽此

覆勘蘇州府城修理完竣摺子

奏爲覆勘蘇州府城先後兩次修理完竣恭摺具  
奏仰祈

聖鑒事竊照蘇州府城垣於嘉慶二十五年間因間  
段坍塌據長洲元和吳縣三首縣詳據紳士呈  
請捐修並請將吳淞江餘剩節省銀一萬八千  
餘兩給發奏用經前撫臣陳桂生於奏報疏濬  
吳淞江完工摺內

奏明嘉慶二十五年五月奉

硃批知道了欽此嗣據該府縣勘覆估需工料銀二萬

七千三百餘兩除動用吳淞江節省銀一萬八千餘兩又紳士捐輸銀六千七百二十八兩零其餘不敷銀兩該三縣捐補足數修理完竣嗣經前撫臣張師誠於請修道光三年續冊城垣摺內

奏明前修工程是否一律堅固取造冊結由藩司驗收再行覆勘具

奏茲據蘇州藩司賀長齡詳稱此案城垣原派三縣承修內長洲縣原估銀七千四百二兩零元和縣原估銀一萬三千五百二十四兩零吳縣

原估銀六千四百一十八兩零據該三縣具報於道光四年十一月以前先後照估修理完竣經前任藩司誠端驗收在案茲已飭取冊結詳請覆勘具

奏又前次未修處所續有坍塌及道光三年夏間因雨水過多河水漫浸城根復有坍塌經前撫臣札飭勘估詳辦據蘇州府知府額騰伊督同長洲元和吳縣詳加查勘估需工料銀三萬九千六百一十四兩零由前任藩司誠端覆勘無浮查有陳青選罰項銀二萬九百六十五兩零

又嘉慶二十三年挑竣吳淞江餘剩經費錢合  
銀九千二百四十三兩零又道光三年官民捐  
賑餘剩銀九千四百七十兩零均屬閒款堪以  
奏撥興修詳經前撫臣奏奉

諭旨張師誠奏籌款修理城垣一摺江蘇蘇州府城  
垣前次未經修理處所續又間段坍塌並因上年  
河水漫浸城根復多坍塌必須修復完整茲據該  
撫勘明共估需工料銀三萬九千六百一十四兩  
零查有吳縣現在罰繳充公銀兩及挑浚吳淞江  
餘剩經費發商生息本銀並上年官民捐賑案內

餘剩銀共三萬九千六百七十餘兩均屬司庫閒款著准其奏撥趕辦俟工竣該撫親往驗收如有偷減草率等弊卽行嚴叅著賠所動銀兩旣係閒款著毋庸造冊報銷該部知道欽此茲據藩司賀長齡詳稱長洲縣應修工段實用銀六千四百九兩零元和縣應修工段實用銀一萬三千九百九十九兩零吳縣應修工段實用銀一萬九千五百七十五兩零據該三縣具報於道光五年九月以前先後修理完竣查係實用實銷並無浮冒請於原籌陳青選罰項等款銀內照數開



銷飭取冊結由該司驗收加結詳請覆勘具

奏前來臣查嘉慶二十五年原辦城工估需工料

銀二萬七千三百四十五兩零除動用吳淞江  
餘剩節省銀一萬八千二百三十三兩零又紳  
士捐輸銀六千七百二十八兩零之外計不敷  
銀二千三百八十三兩零既據長洲等三縣自  
行捐補足數修理完整應請毋庸再議至道光  
三年續修城工一案原估工料銀三萬九千六  
百一十四兩零

奏明於罰繳充公及吳淞江經費生息本銀併捐

賑餘剩共銀三萬九千六百餘兩之內動用應  
請卽於此內開銷現經臣親詣覆勘先後修理  
工程均屬完整尙無偷減草率情弊除將冊結  
分別咨部外所有蘇州府城垣前後兩次修理  
均已覆勘完工緣由謹會同兩江總督臣琦善  
恭摺具

奏伏乞

皇上聖鑒再前一次修理城工所用吳淞江餘剩銀  
兩本係業戶攤捐餘係官紳捐補與續修城工  
之動用閒款情事相同並非動用錢糧應請一

併免其造冊報銷合併聲明謹

奏

道光六年五月十四日具

奏六月十八日奉到

硃批所奏知道了著依議行欽此

御賜藥錠謝

恩摺子

奏爲恭謝

天恩事頃

臣

摺弁回蘇齋奉

御賜藥錠一匣當卽恭設香案叩頭祇領欽惟

皇上德隆康濟

道洽生成四時調玉燭之和八表潤珠囊之色喜占

勿藥烝民之疵癘潛消

念軫如傷

聖主之恫瘝彌篤茲值蒲樽節屆欣叨芝檢

榮頒鍊冶八瓊還丹九轉擎來

闕北香凝寶鼎以分煙捧到江東彩映吳絲而續  
縷臣職慚蘭蓄識愧荅通每當大夏之良辰屢  
拜

上方之珍劑感

恩逾重徧

德靡涯分馨爰逮於羣僚布凱尙思乎黎庶甘同粒  
食慰

九重保赤之心質重砂團勵百爾披丹之愨所有臣  
感激忭幸下忱謹繕摺恭謝

天恩伏乞

皇上聖鑒謹

奏

道光六年五月十四日具

奏六月十八日奉到

硃批覽欽此

日本夷船漂收鎮洋縣境撫卹指引回國摺子  
奏爲日本國夷船漂收鎮洋縣境照例撫卹撥船  
指引出洋回國恭摺奏

聞事據鎮洋縣知縣鄭光偉稟稱道光六年四月十  
五日經甘草司巡檢稟報十三日同砲臺汛兵  
丁瞭見瀏河口外隨風駛到一船似外夷模樣  
隨即會同巡洋官兵往看實係夷船言語不通  
給與紙筆令其書寫據稱係日本國人船主源  
太郎本國北地越州人同水手喜助藤兵衛門  
大右衛門平七木八曾兵衛清三郎小五郎六

助平助等十人裝載昆布煙草貨物於本年三月初四日開船往本國江州地方銷售因附近賣貨並無牌照放洋後突遇大風迷失海道隨風漂蕩見有漁船跟隨行駛於四月十三日到岸現在船貨人口均無損失懇求指引送出大洋一遇西風即可回國隨即查看該夷船人數併所裝昆布煙草俱與所寫相同委係涉海遇風迷失洋面查無別故等情通稟前來當即札委太倉州知州范博文會同營員馳往覆查無異臣查嘉慶十五年海門廳境內曾有日本國



夷人遭風壞船因漁船拯救到境當經委員護送至浙江乍浦口交辦銅商船附搭回國今該國夷人源太郎等十一人裝載該國貨物因迷失海道飄入內洋懇求指引回國自應俯順夷情俾資還輯當經臣札飭該州縣照例撫卹選撥熟悉海道商船指引並飭瀏河吳淞各營派委巡洋官兵妥爲防護令該夷人等乘坐原船由吳淞海口出洋早歸該國仰副

聖主懷柔遠人至意現據寶山縣等報稱該夷船由瀏河開行於五月初二日已抵吳淞海口寄泊

一候風順卽行出口等情所有日本國夷船漂  
收鎮洋縣境護送出洋歸國緣由謹會同兩江  
總督臣琦善恭摺具

奏伏乞

皇上聖鑒謹

奏

道光六年五月十五日具

奏六月十八日奉到

硃批知道了欽此

海運沙船陸續回棹親往督辦摺子 附片一件

奏爲海運沙船陸續回棹並 臣親往督辦緣由恭

摺

奏祈

聖鑒事竊照海運漕糧前於四月內裝兌一百二十  
九萬餘石所有次運未竣米石俟天津回棹船  
隻報有分數 臣仍親赴上海彈壓督辦業經附  
片奏

聞在案茲據辦運委員等呈報回南商船截至五月  
二十二日止已有進口船三百二十餘隻惟上

海存棧米石間有發熱及熱過變色之米而各處存倉餘米亦尙多未到臣隨卽飭屬趕緊剝運到滬除米質本堅顏色紫老無礙食用仍照舊交兌外其霉變稍壞者卽剔除另換好米務俾乾潔現據委員蘇州府額騰伊署松江府李景嶧稟報應換米石俱已齊全靜候派裝又據押運委員川沙營叅將關天培自天津來稟據稱進口船一千一百二十餘隻惟太字錢元森一船裝運丹徒縣漕米四百石尙未收口其餘卸竣米船截至四月二十六日止共已催出海

口空船一千七十二隻該將於催船之際卽挨  
船曉諭令其迅速回南趕裝二運各船商咸稱  
此次裝運漕糧抵津之後隨到隨卸斛兌公平  
毫無阻滯所餘耗米官爲收買無零星糶賣之  
繁較向年攬載客貨尤爲便捷仰沐

皇仁不惟絲毫無累更能餘利均沾是以鼓舞懽  
懽期趕回並有抵津卸米後放空回南之船咸  
稱所帶貨物旣經免稅餘米又蒙

聖恩加賞價值無不懽懽踴躍爭先趕回裝載二運  
情願不往關東載豆逕行南歸者竟有十之六

七併詢北來船隻僉稱成山石島一帶見回南  
沙船尚有一二百號在洋折戩向南行駛日來  
多有北風回棹之船更可迅速等語臣查海船  
全藉風色順利方能來往如期刻下正當夏令  
船宜北行亟應趕趁風汛迅速歲事所有一切  
兌運事宜諸關緊要臣卽日由水路前往督同  
該道府暨委員等妥協籌辦斷不敢因漕務將  
竣稍存大意一俟掃數開行卽當會同督臣漕  
臣繕摺馳

奏仰慰

宸厪所有臣親往上海督辦海運緣由理合恭摺具  
奏伏乞

皇上聖鑒謹

奏

道光六年五月二十八日具

奏七月初二日在常州途次奉到

硃批知道了欽此

再辦理海運一切費用均係由外籌款並未絲毫請

帑所有常年例應給丁之漕項銀米多歸節省除兩次撥解過天津應用銀兩外餘銀俟事竣查明報撥其漕贈行月各米前於議請給丁全支月糧案內接准部咨行令將節省米石搭運赴通茲據藩司賀長齡糧道宋潢詳稱道光五年分蘇屬應徵漕贈五米及白糧盤耗運船水手飯米等三款共米九萬八千七百二石零已據徵存在倉此項米石原係例應給丁之款現因



海運省出歸公與應行起運漕糧不同若搭運  
赴通南北經費無款可籌應請就近糶變等情  
查蘇屬徵存積年緩帶漕米現奉

諭旨允留本省糶濟民食所有此項贈五等米九萬  
八千七百餘石本係節省所餘並非正米應請  
一併留省按照時值每石酌定價銀二兩二錢  
五分出糶提銀解歸道庫另行報撥以歸核實  
尙有五年分行月一款共米九萬三千餘石除  
應給接運漕白丁船全支本色月糧及滿號免  
雇等船苦蓋併濟造行月糧米約共需米八萬

五千餘石尙應剩米八千餘石現未具報全完  
應俟奏銷案內核計完欠造報留爲下年辦運  
奏派幫丁之用毋庸糶撥除咨明戶部外謹會  
同督臣琦善漕臣陳中孚合詞附片陳明伏乞  
聖鑒謹

奏

道光六年五月二十八日附

奏七月初二日在常州途次奉到

硃批轉行照辦欽此

海運全竣船行順利摺子

總督會稿

奏爲恭報海運漕糧全數兌開完竣船行順利仰  
祈

聖鑒事竊照本年蘇屬辦理海運所有初運米石及  
二運絡繹開放情形節經臣等

奏報在案茲

臣

陶澍因商船回棹業有成數復自

省馳抵上海督同委員等慎選米質尅期斛交  
各船踴躍逾恒爭先受兌總計蘇州松江常州  
鎮江太倉等四府一州額徵道光五年分起運  
漕白正耗米一百四十五萬一千三十一石零

又節省歸倉候撥耗米五萬九千六百七十五石零又給船耗米十二萬餘石通計裝載正耗各米共一百六十三萬三千餘石前後用沙船及浙江蛋船三不像船共一千五百六十二隻截至六月初五日止掃數解交完竣伏念

國家河運已數百年暫因河務艱阻分由海運創始甚難人情觀望誠以

天庾重大向不航海舵工水手皆非官役可比既虞壓雇復懼難交畏縮弗前或相避匿其難一也河運弁丁數千各司其事沿途催趲層層照

料尙不免風火沉失之虞今以新定章程責之  
素不相習之委員保無疎損其難二也各州縣  
米赴上海多者八九萬少者二三萬同時雇剝  
船隻難敷倘紛紛封捉卽爲行旅商民之病其  
難三也各州縣距黃浦水次或六七百里或一  
二百里遠近不齊旣恐停船待米守候需時又  
恐米到船稀無從寄頓况商行斛手無多盤量  
稍稍卽誤風汛其難四也海運用費初無成式  
籌畫稍疎更恐不肖官吏借端擾累易致刁民  
藉口其難五也商船赴津風利東南及至回帆

又宜西北一往一來非祇旬期萬一停阻有妨  
二運其難六也以上數端辦理稍有未慎易滋  
貽誤至於波濤之險更屬人所難防當此河道  
淺阻搬剝維難臣等仰體

宵旰焦勞再四圖維舍海運別無良策是以上年六  
月到任之始卽經會議意見相同臣陶澍隨赴

上海開誠曉諭招徠商船復經臣琦善

奏派藩司賀長齡前任降調河北道鄒錫淳續往

添雇船隻會同各員詳議章程奏奉

諭旨允行

臣

琦善

因河工緊要不克分身屢次函商

硃批

務期周妥臣陶澍親駐督辦數月以來商情感奮民康安堵自開兌以至歲事諸極順利仰仗聖主如天之福共效子來不日之成惟

宸謨早定於幾先俾海道咸歸於坦蕩臣陶澍現在

親詣海口督飭放行會同提臣王應鳳諄飭沿

海水師校織巡防並派京口副將湯攀龍押尾

前進連日南風正利洋面波恬船行穩速約計

六月下旬即可全抵天津所有海運辦竣緣由

臣等謹合詞繕摺由驛馳

奏伏乞

皇上聖鑒再漕臣陳中孚押運北上未及會銜合併

聲明謹

奏

道光六年六月初五日由驛具

奏六月二十四日奉到

硃批另有旨欽此



海運全竣請將在事尤爲出力各員量加鼓勵

摺子

附清單總督會  
稿又附片一件

奏爲海運全竣請將在事尤爲出力各員恭懇

天恩量加鼓勵仰祈

聖鑒事竊照蘇省試行海運事屬創舉關係重大分

任需人臣等於議辦之初卽以雇船爲第一關

鍵籌款爲濟用要需而一切文案章程鈎稽冊

檔以及驗米兌米各事宜均極繁重必須實心

經理方能趨事赴功當飭藩司賀長齡等遴選

誠實勤幹之員各量材能分別派委復經臣等

隨時激勸逐件指示在事文武大小一百餘員  
晝夜奮勤不辭勞瘁或招雇商船料理經費或  
綜核文冊酌議章程或驗兌漕糧迎提催趨或  
專駐公所收發出入或巡防彈壓經歷島洋莫  
不竭盡心力各供指臂而各州縣經徵漕米趕  
早全完又皆慎選米色籌解經費絲毫不累閭  
閻現在全漕一百數十萬石一律開行以數百  
年未行之事上稟

宸謨如期妥竣似應加以鼓勵查藩司賀長齡綜理  
全局布置精詳臬司慶善辦事細心同資贊畫

蘇松糧道宋潢蘇松太道潘恭常駐浦驗兌始  
終其事均係司道大員

恩出

聖裁臣等未敢擬請優叙其赴津交米解銀各員及  
押運之將弁等俟交米全竣另行具

奏外所有辦漕在事各員人數衆多臣等不敢濫  
登薦牘亦不敢泯沒其勞謹擇其尤爲出力者  
開具清單恭呈

御覽可否仰懇

天恩量予鼓勵出自

鴻施其餘各員應分別咨部議叙由外記功核實辦理再急公領運之船商紳耆人等應加獎勵現飭該司道查明造冊遵照章程

奏咨辦理

臣

等謹合詞恭摺具

奏伏乞

皇上聖鑒訓示謹

奏

道光六年六月初五日由驛具

奏六月二十四日奉到

硃批汝總辦此事諸凡妥順朕深嘉悅另有恩旨欽

此

謹將蘇省辦理海運尤爲出力各員開具清單  
註明實績恭呈

御覽

蘇州府知府額騰伊

松江府知府陳鑾

該二員督辦本屬運務一切妥洽並派駐上  
海綜司驗船兌米各務井井有條經理咸宜  
應請

賞加道銜

署松江府知府川沙廳同知李景嶧

前任蘇州府督糧同知俞德淵

該二員官聲素好篤實練勤派駐公所料理  
全局李景嶧任勞任怨力肩終始俞德淵現  
已丁憂回籍而籌定章程極爲得力應請將  
該二員

賞加知府銜李景嶧遇缺陞用俞德淵俟服闋引  
見後遇缺陞用

上海縣知縣許乃大

該員調任上海稽查彈壓始終其事經理得

宜應請以同知直隸州儘先陞用

崇明縣知縣王青蓮署崇明縣丞江陰縣丞畢  
以紱

查崇明地居海外十溲緊接大洋爲商船寄  
棧守風之所該員等彈壓巡防親歷波濤數  
月之久王青蓮畢以紱均請以應陞之缺儘  
先陞用

試用知縣陳用珩兩淮候補鹽大使黃冕

該二員來往催漕驗米交兌不辭勞瘁最爲  
出力陳用珩應請不論繁簡遇缺卽補黃冕

應請遇缺儘先補用

寶山縣主簿周恭壽

該員自上年派令隨同籌議海運一切事宜  
鉤稽文案冊檔晝夜奮勤始終出力應請以  
縣丞儘先陞用

試用同知吳廷揚試用通判顧文光試用理問  
陳仁吳景周試用縣丞嚴偉試用府經歷陳溶  
試用從九品魏邦魯余錫溥劉國正

以上九員或驗米監兌或稽核文案均能勤  
慎妥協應請各按本班儘先補用



長洲縣丞錢兆麟嘉定縣丞姚大成吳江縣丞  
蕭翽江陰縣巡檢俞昌會

以上四員或經理度支或查船兌米風雨寒  
暑備極辛勤應請儘先陞用

武進縣丞陸鈞松江府經歷張慶瑗長洲縣主  
簿劉琅

以上三員查船兌米均極出力應請各按本  
班以應陞之缺陞用

候補未入流虞芝林

該員派辦公所文案奮勉任勞應請補缺後

以應陞之缺陞用

太湖廳巡檢謝元淮青浦縣巡檢方景雯

以上二員委辦查船兌米各事極爲得力惟該員等本有奉

旨儘先陞用之案應請不論繁簡遇缺卽陞

又查武職出力三員

提標前營遊擊署上海遊擊福智

署提標右營守備候補守備劉均

提標千總李炳忠

查黃浦至吳淞海口剝船商船梭織往來最

關緊要該員等防護稽查始終勤奮福智李炳忠請以應陞之缺陞用劉均請儘先補用道光六年六月二十四日承准

軍機大臣知會

貴督等奏辦理海運尤爲出力各員單奉硃批另有旨欽此單留本處備查爲此知會

同日奉到道光六年六月十七日內閣奉

上諭琦善等奏海運漕糧全數兌開完竣請將出力人員鼓勵各一摺上年河務阻滯諸臣奏請試行海運事屬創始辦理維艱仰賴

神靈垂佑在事臣工竭誠宣力雇船兌運籌畫周  
詳計起運漕白正耗各米一百六十三萬三千餘  
石用船一千五百六十二隻兩次絡繹開放穩抵  
津門諸凡妥順朕心深爲嘉悅自應卽沛恩施以  
昭獎勵琦善督飭有方可嘉之至著交部議叙陶  
澍親駐督辦深協機宜著賞戴花翎藩司賀長齡  
布置精詳臬司慶善細心贊畫蘇松糧道宋潢始  
終其事俱著交部議叙調任蘇松太道潘恭常駐  
浦籌辦經理得宜著賞加按察使銜所有單開尤  
爲出力之蘇州府知府額騰伊松江府知府陳鑾

俱著賞加道銜川沙廳同知李景嶧前任蘇州府  
督糧同知俞德淵俱著賞加知府銜李景嶧著遇  
缺陞用俞德淵俟服闋引見後遇缺陞用上海縣  
知縣許乃大著以同知直隸州儘先陞用崇明縣  
知縣王青蓮署崇明縣丞江陰縣丞畢以紱俱著  
以應陞之缺儘先陞用試用知縣陳用珩著不論  
繁簡遇缺卽補兩淮候補鹽大使黃冕著遇缺儘  
先補用寶山縣主簿周恭壽著以縣丞儘先陞用  
試用同知吳廷揚試用通判顧文光試用理問陳  
仁吳景周試用縣丞嚴偉試用府經歷陳溶試用

從九品魏邦魯余錫溥劉國正俱著各按本班儘  
先補用長洲縣丞錢兆麟嘉定縣丞姚大成吳江  
縣丞蕭翮江陰縣巡檢俞昌會俱著儘先陞用武  
進縣丞陸鈞松江府經歷張慶瑗長洲縣主簿劉  
琅俱著各按本班以應陞之缺陞用候補未入流  
虞芝林著俟補缺後以應陞之缺陞用太湖廳巡  
檢謝元淮青浦縣巡檢方景雲該員等本有儘先  
陞用之案著不論繁簡遇缺卽陞提標前營遊擊  
署上海遊擊福智提標千總李炳忠俱著以應陞  
之缺陞用署提標右營守備候補守備劉均著儘

先補用其餘應子讓叙記功各員及尤爲出力之  
船商紳耆人等並著查明分別辦理該部知道欽  
此又文武大小一百餘員以下奉

旨折角欽此

再本年海運由外籌款卽以向來辦漕雜費充用並未請

帑所有常年河運例應給丁漕項銀米除迭次撥解天津應用及調劑旗丁案內全支月糧外尙有節省銀十餘萬兩米十餘萬石現將節省給丁贈五等米

奏請變易銀解道其餘節省漕項並飭糧道查明徵存實數報部候撥又有節省耗米五萬餘石搭運赴津除撥給經紀耗米外尙剩米四萬餘石歸倉是蘇省辦理海運不但絲毫未費



帑項且較常年河運所省之數甚多至商船搭載  
二成客貨仰蒙

恩旨准其免稅以示體卹現據委管海關道潘恭常  
稟稱約計海運商船所免稅銀不過一萬餘兩  
應在該關額徵稅銀項下劃除現飭該道逐細  
查明另冊咨部外合併附片陳明伏祈

聖鑒謹

奏

道光六年六月初五日由驛附

奏六月二十四日奉到

殊批所辦甚好欽此

海運默邀

神佑請加封號扁額摺子

奏爲海運默邀

神佑化險爲平恭懇

天恩賜加封號扁額仰祈

聖鑒事竊照海運自南赴北經歷重洋數千餘里茫  
無畔岸偶值風濤人力難施臣前於沙船初次  
開行時恭詣寶山縣海口地方致祭

風神

海神並因上海縣黃浦江岸建有

天后廟歷著靈應率屬虔誠齋禱祈保平安迨二月二十五六七等日西北風暴大作勢甚猛烈三月初一二三等日又起北風大暴其時初運之米一百數十萬石業已開行出洋臣亦回抵省城目擊陸地狂飈揚沙折木遙想海洋風浪彌覺寢食難安悚惕之餘載申默禱嗣據押運叅將關天培稟報沙船一千餘隻正抵黑水大洋迭遭風暴各船齊下太平筐簞隨風漂淌歷數日數夜危急之頃若有

神助及至收口竟未損失一人逮先後駛抵天津

上園水次查驗米石惟蔣朱順吳裕隆徐茂順  
彭永和周昇泰等五船因風懸艙拋去漕米十  
餘石數十石不等趙聯盛一船在廟島沉濕米  
六百餘石通共損失糧米八百餘石以到津米  
數計之不及千分之一其餘彭巨隆陳隆泰張  
元庚何恒新閻聚泰吳恒發袁慶發張茂利等  
八船業因遭風斫斷大桅米石毫無漂失祇有  
錢元森一船尙未抵津所裝僅止四百餘石且  
春夏南風司令北回須用折戩本年夏令間有  
北風是以來去各船均皆穩速分風劈流不爽

時日計自初運以逮告竣往返水程幾及萬里  
在船菅柁水手不下二三萬人現查到津各船  
並未傷損一名尤爲向來未有之事良由

聖明在上百靈効職嘉生翊

順利漕安潤屬在臣民同深感凜伏查

天后之神在元代至元年間卽以護衛海漕加封  
致祭載在元史我

朝靈貺宣昭疊蒙

勅賜封號本年海運化險爲平顯應尤著合無仰懇

皇上天恩

賜加封號以表

庠嘉其海口之

風神廟

海神廟並懇

御書扁額

頒發恭摹一體懸掛俾

靈佑長昭洋情允戴據辦運委員李景嶧許乃大  
等具詳前來謹會同兩江總督臣琦善合詞恭  
摺附驛具

奏伏乞

皇上聖鑒謹

奏

道光六年六月初五日由驛具

奏六月二十四日奉到

硃批所奏甚是另有諭旨欽此又同日奉到道光六年六月十七日內閣奉

上諭陶澍奏海運默邀

神佑請加封號扁額一摺所奏甚是本年試行海運該撫陶澍恭詣寶山縣海口致祭

風神



海神並詣上海縣黃浦江岸虔禱

天后廟沙船正抵黑水大洋迭遇風暴危急時若有

神助並未損失一人卽有遭風斷桅各船米石毫無漂失利漕安瀾覽奏實深欽感著發去大藏香十炷交陶澍祇領遣員詣各處

神廟敬謹祀謝

天后之神疊彰靈應我朝屢加封號本年海運化險爲平顯應尤著着禮部察例擬加封號候朕酌定以昭

靈貺海口

風神廟

海神廟並發去御書扁額交該撫敬謹懸掛以答神庥欽此

道光六年六月二十四日承准

軍機處知會本日欽奉

諭旨發去大藏香十炷

風神廟

海神廟

御書扁額應俟扁額

發下後同藏香一併寄往爲此知會六月十七日